

Blok 7, koji je najveća poslijeratna investicija u energetsom sektoru u BiH, još je na čekanju. Sve pripreme su završene, revizija više nema. Sada je samo na Vladi Federacije i Parlamentu da donesu konačnu odluku o realizaciji ove investicije.

Blok 7 od 450 megavata bit će jedini te snage u regionu. Koštat će milijardu i po maraka. Samo zahvaljujući razumijevanju Vlade Kine, koja će kreditirati ovaj projekat, trebao bi biti ekonomski isplativ.

“Kineska vlada je dala preporuku kineskoj Razvojnoj banci da ponudi najkvalitetniji mogući kredit za izgradnju termoblokova. Posebno ističem period vraćanja kredita od pet godina grejs period i 15 godina period vraćanja. Time je projekt postao isplativ”, kazao je direktor EPBiH Bajazit Jašarević.

Revizija Bloka 7 više nema. Vlada i Parlament FBiH moraju u naredna četiri mjeseca donijeti konačnu odluku.

“EPBiH je izvršila sve revizije, na Vladi je da odluči koji stepen provjere studije će izabrati. Mi mislimo da je projekat spreman za konačno odlučivanje”, ističe Jašarević.

No, za budućnost bloka u Tuzli najvažnija će biti stabilnost rudnika koji su u izuzetno teškoj finansijskoj situaciji. Rudnik Kreka, koji će najvećim dijelom snabdijevati ugljem Blok 7, ima više od 200 miliona dugovanja, zbog čega su svakodnevno računi tog rudnika blokirani.

Rudari su bez zdravstvenog osiguranja, a i plate su upitne.

“Probali smo sve da učinimo da alarmiramo sve odgovorne da se stanje u rudnicima riješi. Međutim za sada od toge nema ništa nije. Prošle godine u ovo isto vrijeme bili smo svi sretni kada smo dobili obećanje EP-a o milionskim ulaganjima u rudnike Kreka. Realizacija tih ulaganja je, nažalost, izostala”, naveo je Zuhdija Tokić, predsjednik Sindikata rudnika Kreka Tuzla.

U EP-u vide jedino rješenje u hitnom prestrukturiranju rudnika, pa čak i otpuštanju određenog broja rudara. I plate rudara će biti manje, jer se, kako kažu u EP-u, mora smanjiti i onako niska cijena uglja.

“Cijena energije na tržištu je vrlo niska. Mi sa ovom cijenom uglja ćemo teško ostati konkurentni. Mi moramo raditi na tome da rudnici izmire sve obaveze i da u posljednjoj fazi dođe do smanjenja cijene uglja da bi EPBiH mogla opstati na tržištu”, upozorava Jašarević. Najveći teret će opet biti na rudarima, koji rade za mizerne plate i u nehumanim uslovima. Za 50 posto će morati povećati proizvodnju uglja, čija će cijena biti sve niža, što će finansijski oslabiti rudnike, koji će, pored otpuštanja rudara, posegnuti i za smanjenem plata.

izvor: indikator.ba